



QUÆSTIO MEDICA,
CARDINALITIIS DISPUTATIONIBUS
MANE DISCUTIENDA

IN SCHOLIS MEDICORUM,

Die Jovis septimâ Aprilis 1707.

M. ALEXIO LITTRE,

DOCTORE MEDICO,

REGIÆ SCIENTIARUM ACADEMIÆ SOCIO,

PRÆSIDE.

Est-ne aliquod Lunæ in corpora humana imperium?

I.

UT suam commendarent scientiam, nihil non moliti sunt veteres Astrologi. Syderum vim & potestatem prodiderunt ad omnes ferme effectus naturales pertinere. Illis pluviam, ventos, cæterasque ascribere aëris mutationes. Quidquid in visceribus condit tellus, quidquid è sinu profert, astrorum efficientiæ debere statuerunt. Si eos audias nullum animal terram calcât, nulla avis dividit aëra, undas secât nullus piscis, cuius ortus, vita, & mors ab astris non dependeat. Quinetiam asserere non dubitarunt hominum fortunam, imò quascumque res, sive bonè, sive malè gererent, corporum cœlestium efficaciâ dirigi. Astrologorum mendaciis fidem adjunxit nimium credula antiquitas. Doctos, indoctos, magnates, plebeios error ex æquo occupavit. In eum quoque incidere Medici: unde syderibus corpora humana plurimum affici debuerunt. Variæ variis astris virtutes con-

cessæ: alia calida, alia frigida, quædam humida, sicca quædam dicta. Quilibet Planeta in peculiarem corporis partem ex eorum mente influebat. Cor Soli, Lunæ cerebrum, hepar Marti, lien Saturno, Veneri renes, uterus Jovi, pulmo Mercurio putabantur subijci. Posterioribus temporibus astrorum scientia ab errore vindicata est. Eorum cursus, positionesque noscere satis habuerunt Astronomi, rejectis priorum sæculorum commentis. Hinc de syderum potentia, non opinione, sed ratione & experientia differi cæptum à Physicis & Medicis recentioribus. Cum igitur ex solis accessu & recessu diversas tempestatum vicissitudines oriri, constans omnium ætatum observatio probaverit, inconcussum perstitit ejus imperium. Lunæ verò, cæterorumque astrorum summa potestas, nullo satis valido stabilita fundamento, ita à plerisque labefactata est, ut brevi ruitura esse videatur.

II.

LABASCENTI & penè everso Lunæ imperio novus defensor ex Angliâ prodiiit naperrimè. Is Lunæ potentiam non, ut veteres, ficto in res humidas dominio tribuit; non in calore reponit, ut aliqui è Neotericis; sed eam contineri putat virtute, quàm à Lunâ exerceri in atmosphæram comminiscitur. Eandem censet in aëre ac in mari contingere *intumescantiam*, quoties Luna ad loci cujusvis meridianum aut suprà aut infrà horizontem pervenit. Quemadmodum ex mente Newtoni, cui ipse subscribit, ob Lunæ attractionem mare pro sphericâ figurâ induit sphæroidem, cujus longissima diameter producta per Lunam transiret, sic ad insignem altitudinem attolli nos ambientem aëra ob eandem attractionem contendit, similemque figuram assumere. Ex istâ aëris *intumescantia*, quæ bis semper vicenis quinisque horis accidere debet, ipsius gravitatem & vim elasticam concludit imminui; inde fluidorum corpore humano contentorum texturam & motum turbari arbitratur. Experientia judicat sententiam hanc confirmari. Nonnulla epilepsiæ, vertiginis, affectuum hysteri-corum &c. exempla profert, quorum periodi Lunæ motui ad amissum respondebant. Veterum insitens vestigiis, Lunæ efficientiâ in mulieribus consuetam sanguinis vacuationem moveri affirmat, menstruo quidem intervallo; sed aliis alio tempore pro temperamenti aut ætatis varietate, Tandem juxta istius authoris sententiam, qui à morbo acuto crisi-bus liberantur, acceptam salutem referre debent Lunæ crismum efficaci causæ. His præcipuè argumentis cum ab Anglo autore, tum ab aliis, asseritur Lunæ in corpora humana imperium.

III.

NULLIUS momenti videbuntur allata argumenta, si ad rectæ rationis trutinam appendantur. Janidudum enim obsolevit Lunæ in corpora humida potestas. Quæ ab ejus calore deducitur virtus, aut nulla est aut admodum imbecilla. Radii siquidem à Lunâ remissi, & à speculo concavo, cujus magnitudinis diameter est quinquaginta unciarum, reflexi colliguntur in foco semuncialis circiter diametri: focus hic decies millies minor est, quàm amplitudo speculi; unde calor in foco debet esse decies millies intensior eo, qui in aëre dicitur à Lunâ produci; nullus tamen calor in foco percipitur; hinc li-quiddò constat aut nullum aut sanè perexiguum à Lunæ illustratione excitari calorem. Non magis astruitur Lunæ efficacitas commentitia aëris *intumescen-*

nia. Quæ exindè sequeretur de ipsius gravitate decessio, refragante experientia corruit. Etenim juxta astuum maris rationem in aëris pondere insignis contingere deberet mutatio, idèdque consentaneum huic mutationi discrimen in mercurii barometro contenti altitudine observari; quod tamen non animadvertitur, si barometricis ephemeridibus sit fides. Hæc experientiâ redactus ad angustias author prædictus, ad ventos confugit, nihil tamen adjumenti ab illis relaturus. Esto enim, ut ipse contendit, ventus sit causa variè librati in fistulâ Toricellianâ hydrargyri. A diversis igitur ventis pender aucta & immutata aëris gravitas; undè, si quam ipsa inducat in corpora humana mutationem, hæc à ventis oriri potiùs existimanda est, quàm à Lunæ attractione. Quotidianam istam aëris sublationem omninò evertit mercurius diù in barometro æqualiter suspensus: per plures enim dies in eadem altitudine non raro constat, præsertim solstitiorum tempore: si ex actione Lunæ in atmosphæram sextâ quaque circiter horâ augeri & minui debeat aëris gravitas ex Angli authoris hypothèsi; quo pacto æquilibrium servare potest mercurius? An ventis tantum deprimatur aër, quantum Lunæ virtute attollitur? Hoc nemo admiserit, nisi qui opinionibus ducitur nullâ ratione & experientiâ suffultis.

I V.

MORBORUM certâ periodo redeuntium cum Lunæ motu quasi consensu, illos in ipsam refundendos esse nullatenus arguit. Si morbi quorum paroxysmi cum Lunæ phasibus congruunt, calculo subducantur, eorumdem specie morborum, qui à Lunæ motu dissident, vix erunt pars centesima millesima. Igitur fortuitò evenire putandum est, quod ex innumerâ morborum periodorum multitudine, qui statis, at diversis recurrunt intervallis, nonnulli sequantur Lunæ phases. Sive certo spatio redeant morbi intermittentes, sive inordinatè invadant ægros, tunc accedunt cum humor ægritudinis parens in aliâ quâ corporis parte collectus, ad debitam copiam sanguini admiscetur, vel cum in mole sanguineâ fermentum delitescens ad eum pervenit maturitatis gradum, qui morbo efficiendo est idoneus. Menstruam mulierum purgationem à Lunæ efficacîâ repetere vetat ipsa vacationis ratio, quæ nunquam ferè cum Lunæ motu consentit. Illius enim periodi alii sunt triginta dierum, alii viginti novem, alii viginti octo, plurimis breviori aut longiori intervallo continentur; mensis autem Lunarîs est viginti novem dierum cum horis duodecim; undè quæ Lunâ silente modò purgantur, post aliquot menses plenilunii tempore effundunt catamenia. Profluvium hoc parit humor in sanguine mensis spatio genitus, qui in glandulis uteri secretus init fermentationem: illis indè supra modum turgescuntibus comprimuntur arteriæ capillares; hæc nova semper urgente à tergo sanguine paulatim distentæ dissinduntur. Ad solvendo morbos Luna non magis conducit. Utrùm crisiBUS destinati sint quidam dies à primâ morbi invasione numerandi, non inepta est Celsi * dubitatio. Qui dies à veteribus habiti sunt critici, minùs experientiâ constituti videntur, quàm deprompti ex percelebri tunc temporis doctrinâ Pythagoræ, qui magnam numeris imparibus tribuebat facultatem, summam vero efficaciam septenario. Quamvis assignatos dies reverâ decretorios esse constaret, non ad Lunæ motum in Zodiaco, neque ad ejus in atmosphæram actionem, si quæ esset, referri possent: utrique repugnat definitus dierum numerus. Suis quique tempo-

* Lib. 3.
cap. 4.

ribus despumant, qui fermentescunt liquores; sic determinatis spatiis pro morbi, ætatis, sexûs, & temperamenti ratione diversis sanguis ipse defæcatur, ubi germanam ejus constitutionem pervertunt succi vitiosi.

V.

MEDICUM non decet astrorum tam longè diffitorum virtutem arcescere ad explicandos effectus, quorum causæ in ipso corpore vigent. Id quidem antiquis condonandum est, quos multa latebant, quæ in lucem extraxit usus, & posterioris ævi diligentia patefecit. Mirum autem est, quòd invictis rationum momentis eversa syderum potentia etiamnum assertores nanciscatur. Hanc-ne mentem ipsis inspiravit antiquitatis veneratio, an receptæ à plerisque sententiæ averfatio ingessit? Si depositis præjudiciis expendas adedè decantatam stellarum planetarumque, sole excepto, virtutem, nusquam hanc, nisi in hominum opinione, extitisse comperies. Fictitia igitur Lunæ in corpora humida potestas nemini jam est formidanda. Si quis ab ejus lumine pauxillus calor exciteretur, non is est, qui corpora valeat immutare. Plurimum quidem hæc afficiuntur auctâ vel imminutâ aëris gravitate; verùm ista mutatio aliundè, quàm ab efficacîâ Lunæ deducenda est. Aëris compressio ob Lunæ præsentiam concidit eâdem experientiâ, quæ ejus sublationem evertit. Periodicorum morborum recursus, etiamsi cùm Lunæ motu aliquandò consensiant, ab humoris depravati indole & copiâ prodeunt. Sanguinei fluxûs è mulierum utero singulis circiter mensibus erumpentis, causa est à Lunæ virtute diversa. Crises sunt naturæ morbum superantis effectus. Idedè à Lunâ nihil metuendum, nihil sperandum; in medicinâ faciendâ incassum illius habebitur ratio. Remediorum exhibendorum opportunitatem demonstrant tempus morbi, ægri vires, tempestas anni, non Lunæ phasis aut ætas.

Ergò nullum est Lunæ in corpora humana imperium.

Proponebat Parisiis ALEXANDER LE FRANÇOIS,
Parisinus, Baccalaureus Medicus. A. R. S. H. 1707.